

## МЕСЯЦА ДЕКЕМВРИА В 5-Й ДЕНЬ.

### ПРЕПОДОБНАГО И БОГОНОСНАГО ОТЦА НАШЕГО САВВЫ ОСВЯЩЕННАГО НА МАЛОЙ ВЕЧЕРНИ

На Господи, воззвах: стихиры на 4, глас 1.

Подобен: Всехвальнии мученицы:

**З**ритель был еси умом мысленных Сил, \* яко детелен Божественных словес, \* полагая во твоём сердце, \* в немже и восхождения, \* яко лествицу, утвердил еси, \* преподобне Савво, отче наш, \* и ныне молися \* даровати душам нашим мир и велию милость.

**С**авво преподобнейше, \* твою из младенства возложил еси жизнь Христу Богу нашему, \* от негоже укрепляемь, \* плотския страсти помыслу повинул еси, \* худшее покаяря лучшему. \* Темже молися \* даровати душам нашим мир и велию милость.

**Б**огомудре отче наш, \* светильник явился еси величайший, \* просвещая подсолнечную чудес сияньми и Божественными делы. \* Темже по успении Незаходимый ты Свет прият. \* И ныне молися \* даровати душам нашим мир и велию милость.

Слава, глас 2:

**П**реподобне отче, \* из младенства добродетели прилежно обучився, \* орган был еси Святаго Духа, \* и, от него прием чудес действо, \* увещал еси человеки преобидети сладкая. \* Ныне же, Божественным светом чистейше осияваемь, \* просвети и наши мысли, Савво, отче наш.

И ныне, Богородичен:

**В**се упование мое на Тя возлагаю, \* Мати Божия, \* сохрани мя под кровом Твоим.

На стиховне стихиры, глас 2.

Подобен: ДOME Евфрафов:

**Я**вился еси \* от матерних пелен, \* Богоносе отче наш, \* освященный сосуд \* и дом Всесвятаго Духа.

**Стих:** Честна пред Господем \* смерть преподобных Его.

**Н**ося на рамах твоих \* крест Господень, \* демонская мечтания, \* отче наш Савво, \* до конца истребил еси.

**Стих:** Блажен муж, бояйся Господа, \* в заповедех Его восхощет зело.

**Л**ести лукавых демонов \* обличив креста силою, \* уяснил же еси \* славу Христову, \* Савво, отче наш.

Слава, и ныне, Богородичен, подобен тойже:

**В**ладычице благая, \* святяя Твоя руки \* к Сыну Твоему вознеси, \* душелюбивому Содетелю, \* ущедрити рабы Твоя.

Тропарь писан на велицей вечерни

Слава, и ныне, Богородичен: Иже нас ради рождейся:

## НА ВЕЛИЦЕЙ ВЕЧЕРНИ

Блажен муж: 1-й антифон. На Господи, возвах: стихиры на 8, глас 5.

Подобен: Преподобне отче:

**Савво** Богомудре, \* Ангелов равностоятелю, \* единосельниче преподобных, \* собеседниче пророков, \* мучеников и апостолов снаследниче, \* во Свете Невечернем ныне обитайи. \* Егоже лучами сияя Божественными, \* крайнейшим желанием, \* емуже предстоя со дерзновением, \* просвещен и наслаждаяся того виденьми \* и питаюся того добротами непрестанно, \* Христа моля, Христа умоли, преподобне, \* даровати Церкви единомышление, \* мир и велию милость.

**Савво** Богомудре, \* воздержания светило неугасимое, \* светильниче монашествующих пресветлейший, \* любви лучами просвещаемь, \* столпе непреклонный терпения, \* утверждение и сила верою тя чтущих, \* исцелений сокровище, \* жителю пустынный яко воистинну, \* яко рай сию Божественный показав, \* Божественныя плоды приносящу спасаемых, \* Христа моля, Христа умоли, преподобне, \* даровати Церкви единомышление, \* мир и велию милость.

**Савво** Богомудре, \* добродетелей столпе огненный, \* светильниче, иже из моря мирскаго люди к пристанищу Божественному наставляя, \* прелести духа низложивый, \* Духа Святаго чистое приятелище, \* наставниче монашествующих, \* известная мера воздержания, \* смирения светлая высота, \* источниче, точащий врачеваний пучину, \* Христа моля, Христа умоли, преподобне, \* даровати Церкви единомышление, мир и велию милость.

Слава, глас 6:

**Еже** по образу соблюд невредимо, \* ум владыку на страсти пагубныя постнически поставив, \* во еже по подобию, яко мощно, возшел еси, \* мужески бо естество понудив, \* потщался еси хуждшее покорити лучшему \* и плоть поработити духу. \* Темже монашествующих явился еси верх, \* житель пустынный, благотекущих обучитель, \* правило добродетели известнейшее. \* И ныне на Небесех зеркалом разрешшимся, \* отче наш Савво, \* чисте зриши Святую Троицу, \* моляся несредственне о иже верою и любовию чтущих тя.

И ныне, Богородичен глас 6:

**Кто** Тебе не ублажит, Пресвятая Дево; \* кто ли не воспоет Твоего Пречистаго Рождества; \* безлетно бо от Отца Возсиявый Сын Единородный, \* Тойже от Тебе, Чистыя, пройде, \* неизреченно воплощся: \* естеством Бог сый, \* и естеством быв Человек нас ради, \* не во двою лицу Разделяемый, \* но во Двою Естеству \* неслитно Познаваемый. \* Того моли, Чистая, Всеблаженная, \* помиловатися душам нашим.

Вход. Прокимен дне. Чтения 3.

Премудрости Соломоновы чтение (глава 3):

**Праведных** души в руке Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие – сокрушение, они же суть в мире. Ибо пред лицом человеческим, аще и муку приимут, упование их бессмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их

возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

#### Премудрости Соломоновы чтение (главы 5, 6):

**П**раведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни; зане десницею покрывает я и мышцею защитит их. Приимет всеоружие рвение свое и вооружит тварь в месть врагом. Облечется в броня правды и возложит шлем – суд нелицемерен. Приимет щит непобедимый – преподобие, поострит же напрасный гнев во оружие, споборет же с ним мир на безумных. Пойдут праволучныя стрелы молниины, и, яко от благокругла лука облаков, на намерение полетят. И от каменометныя ярости, исполнь падут грады, вознегодует на них вода морская, реки же потопят я нагло. Сопротив станет им дух силы, и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните судии концев земли. Внушите, держащии множества и горящиися о народех язык, яко дана есть от Господа держава вам и сила от Вышняго.

#### Премудрости Соломоновы чтение (глава 4):

**П**раведник, аще постигнет скончатися, в покои будет. Старость бо честна не многолетна, ниже в числе лет исчитается. Седина же есть мудрость человеком и возраст старости – житие нескверное. Благоугоден Богу быв, возлюблен бысть и живый посреде грешников преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господу душа его, сего ради потщася от среды лукавствия. Людие же, видевши и не разумевши, ниже положивши в помышлении таковое, яко благодать и милость в преподобных Его и посещение во избранных Его.

#### На литии стихира храма.

#### И святаго самогласны, глас 2:

**П**остническое обучение собрав на земли, преподобне Савво, \* и страстей прилоги течением слез твоих вся притупил еси; \* лестнице Божественная и честная, на Небо возводящая, \* всем познася Богоприятное житие твое, \* благочестия бо плоды в нем показав, \* врачуеши ими немощи страстей верно вопиющих ти: \* радуйся, восточная звездо златозарнейшая, \* и монашествующих лампадо светлая, и пастырю; \* радуйся, приснопеваемый, \* пустынное зело добрейшее воспитание \* и Церкви непоколебимое утверждение; \* радуйся, заблуждших великий путевожде; \* радуйся, наша хвало \* и вселенныя светлое радование.

**Н**а земли Ангела и на Небесех человека Божия, \* мира благокрасотство, \* сладость благих и добродетелей постнических похвалу, \* Савву да почтим: \* насажден бо в дому Божии, \* процвете праведно \* и, яко кедр в пустыни, \* умножи паству Христову словесных овец \* в преподобии и правде.

**И**же един на святых опочиваяй Бог, \* освященную душу твою чистое обрет жилище, \* в ню вселися и Божественных благодатей сию исполни, \* имиже ко Свету наставляеши поющих тя, \* освященный Савво блаженне.

## Слава, глас 2:

**Е**же паче ума благих прием желание, \* вся яже в мире красная презрел еси, Богоприятне, \* оттуду бо плодом не запылся еси, якоже Адам; \* змия же отразив воздержанием, \* ангельски житие пожил еси \* и ныне на Небесех водворяеши, \* наслаждался древа жизненнаго, \* Бога моля о нас, \* верно совершающих, освященне Савво, память твою.

## И ныне, Богородичен глас 2:

**О** чудесе новаго всех древних чудес! \* Кто бо позна мать без мужа рождшую, \* и на руку носящую, \* всю тварь Содержащаго? \* Божие есть изволение Рождшееся. \* Егоже яко Младенца, Пречистая, \* Твоима руками носившая, \* и Матернее дерзновение к Нему имущая, \* не престай молящи о чтущих Тя, \* ущедрити и спасти души наша.

## На стиховне стихиры, глас 5.

### Подобен: Радуйся:

**Р**адуйся, постнических воистинну подвигов благовонный сосуде: \* крест бо на рамо взем \* и Владыце Христу себе, всеблаженне, возложив, \* плоти попрах еси долувлекущее мудрование; \* добродетельми же душу просветил еси \* и к Божественному вперился еси желанию. \* Тем всевятую твою окруживше раку, всехвальне Савво, \* Божественнаго Человеколюбия просим получитьи твоими молитвами \* и миру даровати велию милость.

### Стих: Честна пред Господем \* смерть преподобных Его.

**У**гль Богосиянен огню приближився, Богоносе, духа, \* показался еси в мире, Савво, \* просвещая души, верно, Богомудре, приступающих к тебе, \* к Свету путеводя тыя Невечернему, преподобне; \* пустынное же, орошаемъ свыше Божественною благодатию, \* увядил еси углие. \* Тем и победы тебе проявленно дарова венец, блаженне, \* Божественныя правды строитель Христос, \* Егоже моли даровати душам нашим велию милость.

### Стих: Блажен муж, бояйся Господа, \* в заповедех Его восхощет зело.

**Л**ествица Небомерная яве житие твое бысть, Богомудре, \* еюже на высоту возвысился еси \* и Владыце Христу беседовати, всеблаженне, сподобился еси; \* ум просветив тамо сущими осиянии, \* лучами же Того просвещаемъ, \* равноангельну приял еси светлость. \* Емуже и ныне предстоя, молися, преподобне, \* совершающая Божественную и всесвященную память твою \* с тобою представи и миру даровати велию милость.

## Слава, глас 8:

**М**онахов множества \* наставника тя почитаем, отче наш Савво: \* твоею бо стезею воистинну право ходити познахом. \* Блажен еси, Христу работав, \* и вражию обличил еси силу, \* Ангелов собеседниче, преподобных сопричастниче и праведных. \* С нимиже молися Господу \* помиловатися душам нашим.

## И ныне, Богородичен, глас 8:

**Б**езневестная Дево, \* Яже Бога неизреченно заченши плотию, \* Мати Бога Вышняго, \* Твоих рабов мольбы прими, Всенепорочная, \* всем подающи очищение прегрешений: \* ныне наша моления приемлющи, \* моли спастися всем нам.

На благословении хлебов.

Тропарь, глас 8:

Слез твоих теченьми пустыни бесплодное возделал еси, \* и иже из глубины  
воздыханьми во сто трудов у плодоносил еси, \* и был еси светильник вселенней, сияя  
чудесы, Савво, отче наш, \* моли Христа Бога спастися душам нашим.

И Богородице Дево:

## НА УТРЕНИ

На Бог Господь: Тропарь, глас 8:

Слез твоих теченьми пустыни бесплодное возделал еси, \* и иже из глубины въздыханьми во сто трудов у плодоносил еси, \* и был еси светильник вселенней, сияя чудесы, Савво, отче наш, \* моли Христа Бога спастися душам нашим. [Дважды]

Слава, и ныне, глас 8:

Иже нас ради Рождейся от Девы, \* и распятие претерпев, Благий, \* испровергий смертию смерть, и Воскресение явлей, яко Бог, \* не презри, яже создал еси рукою Твоею, \* яви человеколюбие Твое, Милостиве, \* приими Рождшую Тя Богородицу, молящуюся за ны, \* и спаси, Спасе наш, люди отчаянныя.

По 1-м стихословии седален, глас 1.

Подобен: Лик Ангельский:

Житие благочестно на земли скончав, \* приятелище чистое ты духа явился еси, \* просвещая верою к тебе притекающая, блаженне. \* Темже моли твоего Владыку просветити души наша, \* воспевающих тя, Савво Богомудре, отче наш.

Слава, и ныне, Богородичен:

Всех Творца и Бога же и Содетеля, Всенепорочная Чистая, \* Духом Божественным в ложе снах зачала еси \* и без исления родила еси. \* Егоже славяще, Тя воспеваем, Дево, \* яко палату Царя всех и мира защищение.

По 2-м стихословии седален, глас 4.

Подобен: Явился еси днесь:

Возсияв, якоже солнце, лучами облистаеши, преподобне, \* всему миру, далечесиятельными учении твоими, \* чудный Савво светоносче, преподобных похвало.

Слава, и ныне, Богородичен:

В кров Твой, Всечистая Дево, \* прибегающих нас мольбу приемши, \* не престай молящи Человеколюбца спасти рабы Твоя.

По полиелеи седален, глас 8.

Подобен: Премудрости:

Из утробы освятился еси яко воистинну священнейший, Савво, \* и на земли, яко Ангел, пожил еси: \* плоть бо умертвил еси воздержанием, \* Евфимия бо Великаго нраву достойно поревновал еси \* и Троицы показался еси угодник, блаженне. \* Темже и к ревности Божественнаго твоего жития \* лики совокупил еси монашествующих, \* приснопамятне, Богоносе отче наш, \* молися Христу Богу грехов оставление подати \* чтущим любовию святую память твою.

Слава, и ныне, Богородичен:

Небесную дверь и кивот, \* всесвятую гору, светлый облак воспоим, \* неопалимую кушину, словесный рай, \* Евы воззвание, вселенныя всея великое сокровище, \* яко спасение в Ней содеяся мира \* и оставление древних согрешений. \* Сего ради и вопием Ей: \* молися Сыну Твоему прегрешений оставление даровати \* благочестно покланяющимся всесвятому Рождеству Твоему.

Степенна, 1-й антифон 4-го гласа.

Прокимен, глас 4: Честна пред Господем \* смерть преподобных Его.

Стих: Что воздам Господеву о всех, яже воздаде ми.

Всякое дыхание:

### Евангелие от Луки, зачало 24.

**В**о время оно, ста Иисус на месте равне, и народ ученик Его, и множество много людей от всея Иудеи и Иерусалима, и помория Тирска и Сидонска, иже приидоша послушати Его и исцелитися от недугов своих, и страждущии от дух нечистых, и исцеляхуся. И весь народ искаше прикоснуться Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтесь в той день и възиграйте, се бо мзда ваша многа на небеси.

### По 50-м псалме стихира, глас 6:

**Преподобне отче, \* во всю землю изыде вещание исправлений твоих. \* Тем на Небесех обрел еси мзду трудов твоих, \* демонския погубил еси полки \* и Ангельския достигл еси чины, \* ихже житию непорочно поревновал еси. \* Дерзновение имея ко Христу Богу, \* мир испроси душам нашим.**

**Канон Пресвятыя Богородицы на 6, глас 2, егоже краегранесие: Пою хвалу Живоносней Отроковице.**

### Песнь 1

**Ирмос: Нетрену, необычну, \* немокренно морскую шествовав стезю, \* избранный вопиаше Израиль: \* Господеву поим, яко прославися.**

**Н**евещественная древле лествица и странно оляденевший путь моря Твое являше Рождество, Чистая, Юже поем вси, яко прославися.

**С**ила Вышняго, ипостась совершенная, Божия Мудрость, воплощаяся, Пречистая, из Тебе, человеком беседова, яко прославися.

**П**ройде сквозе дверь непроходную заключенный утробы Твоя правды Солнце, Чистая, и миру возсия, яко прославися.

**Канон преподобнаго на 8, глас 8, егоже краегранесие: Всеизряднаго в постницех Савву любезно пою. Творение Феофаново.**

### Песнь 1

**Ирмос: Колесницегонителя фараоня погрузи \* чудотворяй иногда \* Моисейский жезл, крестообразно поразив \* и разделив море, \* Израиля же беглеца, пешеходца спасе, \* песнь Богови воспевающа.**

**С**ветозарением Святаго Духа, Савво, озари благочестною любовию песньми восхваляющия тя, постников похвалу, монашествующих славу, пустыни украсителя, благочестия учителя.

**В**сю любовь к Богу возложив от юности, и к Нему, радуясь, все твое желание имея, плоти движения и страстей находы воздержанием умертвил еси, Савво Богоносе всехваляне.

**П**обедив плодом, сокровеннаго змия попрали еси и того сети легко преминули еси, Богочестия крылы вперився, отче; жизнь же, радуясь, объял еси от сада крестнаго.

**П**росвещаемъ Светом благодати, во огонь вшел еси, якоже трие отроцы пребыли еси неопален, Богу ты сохранишу и являюще всем будущее тебе преспеяние, послеще, отче, и совершение.

**Богородичен:** Неудержными на нас смерть стремельми ятся, но, Твоему Рождеству приближившия, погибе и, приразившия, упразднися, Богородице Дево, Жизнь бо воистинну присносущную воплотившуюся родила еси.

**Катавасия:** Спасе люди чудодействуй Владыка:

### Песнь 3

**Ирмос:** Лук сокрушился сильных \* державою Твоею, Христе, \* и силою немощствующих \* препоясашася.

**И**же времени вне всякаго, яко времен Творец, из Тебе, Дево, вольно Младенец создася.

**Ч**рево, пространшее Небес, воспоим, имже Адам на Небесех, радуясь, жительствует.

### Ин

**Ирмос:** Утвержден в начале Небеса разумом \* и землю на водах основавши, \* на камени мя, Христе, заповедей Твоих утверди, \* яко несть свят, паче Тебе, Едине Человеколюбче.

**У**м владыку над страстьми, всебогате, поставив, податель правды показался еси, лучшему бо яве худшее повинул еси. Темже, яко финикс, отче, в пустынях процвел еси.

**П**оследовати разумев стопам Владыки, пресельник отечества был еси и, в пустыни обитая, победу воздвигл еси на противоборныя, Божественною силою укрепляемъ.

**Т**вердостию разума, всеблаженне, укрепляемъ, различная вражия коварства обличил еси, мудре, и всем явил еси и гордыню онаго возвышенную низложил еси.

**С**вященна ты душею и простоты изволения добродетельми украшена видя, светлейшая звезда Евфимий прият, пророчески вещая твою, всеблаженне, светлость.

**Богородичен:** Спасительнаго нас ради Слова строения светлая Ты, Мати Дево, дверь позналася еси воистинну: Ты бо нам ввела еси умную лучу Пребожественнаго Божества.

**Катавасия:** Призри на пения рабов, Благодетелю:

Седален, глас 8.

Подобен: Премудрости:

**З**емная вся оставив, в мире сый телесно, \* духом был еси Ангелом сопричастник: \* настоящий бо страсти телесныя умертвив, \* Троицы показался еси служитель, блаженне. \* Темже и недугующих врачуешаи страсти \* и словом духи отгониши благодатию, Богоносе отче наш; \* молися Христу Богу прегрешений оставлению дароватися \* празднующим любовию святую память твою.

Слава:

**М**олвы житейския оставив, \* крест твой на рамена взем, \* всего возложил еси тебе Богу, \* плоти же и мира вне быв, \* Духу был еси Святому собеседник. \* Темже и к ревности люди воздвизая, \* грады истощил еси \* и пустыни грады сотворил еси, Богоносе отче наш, \* моли Христа Бога прегрешений оставлению дароватися \* празднующим любовию святую память твою.

#### **И ныне, Богородичен:**

**Я**ко Всенепорочная Невесто Творца, \* яко Неискусомужная Мати Избавителя, \* приятелище яко сущи Утешителя, Всепетая, \* беззаконию мя суща скверное обителище \* и демоном игралище в разуме бывша, \* потщися и тех злодействия мя избавити \* и светлое жилище добродетелей соверши, Светоносная, Нетленная, \* отжени облак страстей и Вышняго причастия сподоби \* и Света Невечерняго молитвами Твоими.

#### **Песнь 4**

**Ирмос: У**слышах, Господи, \* славное Твое смотрение \* и прославих, Человеколюбче, \* непостижимую Твою силу.

**С**е превозвысися Божественная гора дому Господня превышше сил, Богоматерь явственнейший.

**З**аконов естественных кроме, Едина Дево, рождши Владычествующего тварию, сподобилася еси Божественнаго звания.

#### **Ин**

**Ирмос: Т**ы моя крепость, Господи, \* Ты моя и сила, \* Ты мой Бог, Ты мое радование, \* не оставь недра Отча \* и нашу нищету посетив. \* Тем с пророком Аввакумом зову Ти: \* силе Твоей слава, Человеколюбче.

**Д**ушевное очищая устроение и расширяя Божественными видении, вместию спю воистинну Божественных дарований соделал еси, Богоблаженне: возложением же рук твоих немощствующия исцелил еси, подражатель Владыки быв.

**И**же на тя, отче, люте разсвирепев, поглотиши, яко Дафан окаянный, и, яко Авирон, потребився: тя бо невидимо Божественная храняше благодать, многих промышляюще спасение, всеблаженне, славный Савво Богомудре.

**З**аконом Божиим наказав, Богоглаголиве, чувства, к разумению безтелесных и мысленных твою художную управил еси мысль, проходя неослабно от славы в славу, от силы, отче, в силу.

**Б**лагодетельствовати единоплеменная предложив, в пустыни грады создал еси Боголепны и душеполезны, и в земли жаждущей источники вод извел еси, и тучи с Небесе преславно, Богомудре, в безводных селех низвел еси.

**Богородичен: Н**овоцветный безсмертия рай и красен воистинну показала еси, Древо жизни, в Тебе насажденное, Богоначальнейше чревоносящи и раждающе, всем искапающее спасительныя надежды, верно Богородицу мудрствующим Тя.

**Катавасия: Р**ода человека обновление:

#### **Песнь 5**

**Ирмос: У**гль Исаии проявлейся, \* Солнце из девственныя утробы, \* возсия во тьме заблуждим, \* Богоразумия просвещение даруя.

**Облацы, веселия сладость кропите сущим на земли, яко Отроча дадеся, Сый прежде век, из Девы воплощя Бог наш.**

**Житию и плоти моей Свет возсия и дряхлость греха разруши, напоследок из Девы без семене воплощя, Высочайший.**

**Ин**

**Ирмос: Вскую мя отринул еси \* от лица Твоего, Свете Незаходимый, \* и покрыла мя есть чуждая тьма, окаяннаго, \* но обрати мя и к свету заповедей Твоих \* пути моя направи, молюся.**

**Неуклонною мыслию к твоему Желаемому простираяся, от Него благодать величайших чудес независтну приял еси, отче, и верно приходящия сострадательно уврачевал еси, преподобне.**

**Плотских тяжестей дебелство отложив, сосуд Богоделанен избран был еси Святаго, чудне, Духа, ошпаянием снедей, и молитвою, и терпением, и смиренномудрием украшаемь.**

**Проповедник Божественных догмат велегласнейший рукоположен еси, соборов, отче, святых сообщник был еси, цари умудряя, имиже яве, благодатию Божественною ограждаемь, явился еси, блаженне.**

**От Бога давшаяся благодать тебе, Богодохновенне, провозгласися, раздадеся всем бо вселенныя концы, яве творящия боголепно показания чудес Божественное действо.**

**Богородичен: Верных Предстательница, стена неразрушима благохвалящих Тя, яко всему роду человеческому явльшееся спасение, Бога рождши телесне явльшася, душу мою спаси, Пречистая.**

**Катавасия: Из нощи дел омраченныя прелести:**

**Песнь 6**

**Ирмос: Глас глагол молебных \* от болезненныя, Владыко, души услышав, \* от лютых мя избави: \* Един бо еси нашего спасения виновен.**

**Естество человеческое, работающее греху, Владычице Чистая, Тобою свободу улучи: Твой бо Сын яко Агнец за всех закалается.**

**Вошим Ти вси истинней Матери Божии: прогневавшия рабы избави, Едина бо дерзновение к Сыну имаши.**

**Ин**

**Ирмос: Очисти мя, Спасе, \* многа бо беззакония моя, \* и из глубины зол возведи, молюся, \* к Тебе бо возопих, и услыши мя, \* Боже спасения моего.**

**Любовь к Богу и ближнему стяжав, закона и пророков исполняя главизну, преимуществую бо всех несосудно добродетель, отче, исправил еси.**

**Равноангельное на земли ты жителство стяжал еси, равноангельну же честь Христос тебе дарова, святых чины спутьшествующия души твоей послав.**

**Премудрости пород явився, начало премудрости возжелел еси – страх Божий, имже укрепляемь, к совершению вместиному человеком, отче, достигл еси.**

**Богородичен: Спаса и Избавителя, Бога всех и Господа рождши, нам плотию приобщившася, спасай, Пречистая, призывающия Тя от бед, Владычице.**

**Катавасия: Обитая Иона:**

## Кондак, глас 8.

Подобен: Взбранной:

**Я**ко от младенства Богу жертва непорочная \* принесся еси добродетелию, Савво блаженне, \* садоделатель быв благочестия; \* темже был еси преподобных удобрение, \* гражданин же пустынный достохвален. \* Темже зовем ти: \* радуйся, Савво пребогате.

**Икос:** **О** отцев верховниче и преподобных красото, постников ко Христу дерзновение, пустынный гражданин и садоделателю. Како воспою твое житие, преподобне? блистаеши бо концем, яко солнце. Тем вопию ти: радуйся, красная кашпадоков славо; радуйся, честное вселенная знамение; радуйся, пустыни добрейшее прозябение; радуйся, праведных Божественное наслаждение; радуйся, яко презрел еси текущая и тленная; радуйся, яко на Небесех со Ангелы обитаеши; радуйся, монашествующих исправление и правило; радуйся, ленищихся к Богу воздвижение; радуйся, источниче чудес Боготочный: радуйся, честный Духа органе; радуйся, имже украсися восток; радуйся, имже западная сияют; радуйся, Савво пребогате.

## Песнь 7

**Ирмос:** **В**итии явишася отроцы любомудрейшии древле, \* от Богоприятных бо души, богословяще устнами, пояху: \* Пребожественный отцев и наш Боже, \* благословен еси.

**З**ряше в нощи убо Иаков яко в гадании Бога, воплощен же из Тебе, светлостию явися поющим: Пребожественный отцев Бог и препрославлен.

**З**намения, еже в Тебе, неизреченнаго проявляя сплетения, со Иаковым борется, чрез еже вольно соединися человеком, Чистая, Пребожественный отцев Бог и препрославлен.

**М**ерзок не проповедуяй Единого Девы Тя Сына от Всепетия Троицы, и несомненною мыслию, и языком вопия: Пребожественный отцев Бог и препрославлен.

## Ин

**Ирмос:** **Б**ожия снизхождения \* огонь устыдеса в Вавилоне иногда. \* Сего ради отроцы в печи, радованною ногою, \* яко во цветнице, ликующе, пояху: \* благословен еси, Боже отец наших.

**О**тложил еси привременная, вечными возмездився, и со Ангелы ликуеши, яко Ангельское пожив житие. С нимиже и пел еси: благословен Бог отец наших.

**В**опиет благодарно ко Господу твоя великая и всечестная Лавра, жителя, и зиждителя, и гражданина тя предлагающа, мудре, и хвалящися зовет: благословен Бог отец наших.

**Н**епрестанно моли Господа, Савво Богомудре, о пастве твоей, прилежно же испроси твоим трудом вечновати присно плодоносящим и любовию зовущим: благословен Бог отец наших.

**Богородичен:** **Н**евестник Пречист паче словесе Слова воплощения, и чертог, и престол правая мудрствующий Тя именуем и, радуящеся, Твоему Сыну зовем: благословен Бог отец наших.

**Катавасия:** **В**сецаря любовию удовлении отроцы:

## Песнь 8

**Ирмос:** **О** подобии злате небрегше трблаженнии юноши, \* неизменный и живой Божий образ видевше, \* среди огня воспеваху: \* осуществованная да поет Господа вся тварь \* и превозносит во вся веки.

**В**иден бысть на земли Тобою и с человеки поживе, Иже благодтию несравненный и силою. Емуже, поюще, вси вернии, зовем: осуществованная да поет Господа всякая тварь и превозносит во вся веки.

**В**оистинну Тя, Чистую, возвещающе, славим, Богородице. Ты бо Единого родила еси, от Троицы воплощенна. Емуже со Отцем и Духом вси поем: да поет Господа всякая тварь и превозносит во вся веки.

## Ин

**Ирмос:** **С**едмерицею пещь \* халдейский мучитель \* Богочестивым неистовно разжже, \* силою же лучшею спасены, сия видево, \* Творцу и Избавителю вопияше: \* отроцы, благословите, \* священницы, воспойте, \* людие, превозносите во вся веки.

**С** веселием, преподобне, святых чины чистейшей твоей души предтекут на место отраднo в светлая селения, идеже праведных лица веселятся. С нимиже ныне поеши: священницы, воспойте, людие, превозносите Христа во веки.

**С**транна твоя чудеса: звери бо укротил еси, утишив страстей волны, предглаголеши будущая пророческим даром, полки демонския прогоняя, язвиши благомошными бдении же и молитвами, и пощеньми, и креста силою непобедимую, Богоносе.

**И**же Моисею первее от столпа вещавый, столп от земли до небесе всесветел простерт тебе показа, идеже ныне лежит терпеливое твое и многострадальное тело. Емуже, верою предстояще, благочестно поем: людие, превозносите Христа во веки.

**Р**адостно память твоя совершается, всехвальне: в радостотворную бо одеялся еси добродетель, истинную ризу спасения, и чистую, и световидную веселия одежду, в нейже ныне, красуясь, поеши непрестанно: священницы, воспойте, людие, превозносите Христа во веки.

**Богородичен:** **Н**еискусобрачно родила еси, Дева пребывши, и странным Рождеством Твоим совокупила еси вся, временную брань и дальнее разстояние разрушивши, Христа, мира дателя, носящи в недрах Твоих. Егоже верно поем и превозносим во веки.

**Катавасия:** **У**тробу неопально образуют:

## Песнь 9

**Ирмос:** **В**есь еси желание, весь сладость, \* Слово Божий, Девы Сыне, \* Боже богов, Господи, святых Пресвятый, \* тем Тя вси с Рождшею величаем.

**Ж**езл крепости дадеся естеству тленному Слово Божие во утробе Твоей, Чистая, и сие возстави, ко аду поползшееся. Темже Тя, Всечистая, яко Богородицу величаем.

**Ю**же изволил еси, Владыко, приими милостивно молитвенницу, Матерь Твою, о нас, и Твоя благодти всяческая исполнятся; да Тя вси яко Благодетеля величаем.

## Ин

**Ирмос:** **У**жасеся о сем Небо, \* и земли удивишася концы, \* яко Бог явися человеком плотски \* и чрево Твое бысть пространнейшее Небес. \* Тем Тя, Богородицу, \* Ангелов и человек чиновначалия величают.

**Б**лагоухает твоя рака духовное благовоние, богато веселящи твоя сыны, ты обстоящая искренно, поминающая, преподобне, Ангельское твое пребывание, и тебе данную светлость, и славу, и присносущную красоту.

**П**роторжеся в пустыни вода, и земля жаждущая в блато бысть, молитвами претворится, отче, твоими: постничестии бо полки сию населяют, яко речну, страна Иорданова процвете, яко крин, напаяема твоими слезами.

**С**ветлость святых на Небесех яко праведнику тебе возсия, отче, Христа бо правду истинную проявленно возлюбил еси; Егоже жительству последуя, всеблаженне, уподобився Сего живоносней, яко мощно бе, святыни.

**Б**огатым, Богоносе, сияя Светом и лики Ангельския видя, световидны обходящая Троический Свет и приемлющая благодатию Боговидения лучи, не престай моля оставления грехов сподобитися поющим тя.

**Богородичен:** Яко всех превышши земнородных несравненными, Чистая, первенствы: Бога бо, всех тварей Творца, во утробу Твою вместила еси. Того моли яко Милостива единомышление, мир, благостояние тихое Церквам даровати.

**Катавасия: Любители убо нам:**

**Светилен:**

**П**устыню град сотворил еси любомудрыми нравы, \* отцев красото, Савво, отче Богомудре, \* и сию совершил еси мысленный рай, \* цветущь цветы Божественными, единоправных множества, \* достойно совершающих твою честную память.

**Слава, и ныне, Богородичен:**

**Я**ко имущи сострадательное и милость велию, \* призри, Всепетая Богородице Дево, на мое смирение \* и страстей молву, и соблазнов жития разори, Отроковице, \* и огня геенскаго избави мя молитвами Твоими.

**На хвалитех стихиры, на 4, глас 1.**

**Подобен: Небесных чинов:**

**П**резиратель дольних и пресельник, \* рачитель Горних \* и пустынный гражданин, Савво Богомудрый, \* всем нам праздновати повелевает \* к Богу отшествия его верно день спасительный. [Дважды.]

**В**не плоти и мира добродетельми быв, \* и теми на земли в житии \* прославил еси Господа славы, отче мудре, \* и по достоянию от Него прославился еси, \* и врачеваний показался еси Божественный источник, \* Савво Богоприятне.

**С**мирен, незлобив, кроток, прост, \* молчалив яко был еси, отче, \* паче человека воистинну, \* и невеществен в вещи дом Божий явился еси, вседостойный, \* яже от Него прибывшая тебе дарования \* милостивно подавая нам.

**Слава, глас 6:**

**П**реподобне отче, \* во всю землю изыде вещание исправлений твоих, \* тем на Небесех обрел еси мзду трудов твоих, \* демонския погубил еси полки \* и Ангельския достигл еси чины, \* ихже житию непорочно поревновал еси. \* Дерзновение имея ко Христу Богу, \* мир испроси душам нашим.

**И ныне: Богородице, глас 6:**

**Б**огородице, Ты еси лоза истинная, \* возрастившая нам Плод живота: \* Тебе молимся, молися, Владычице, \* со святыми апостолы, \* помилувати души наша.

**Славословие великое. И отпуст.**

## НА ЛИТУРГИИ

Блаженны от канона святого, песни 3-я и 6-я.

**У**м владыку над страстьми, всебогате, поставив, податель правды показался еси, лучшему бо яве худшее повинул еси. Темже, яко финикс, отче, в пустынях процвел еси.

**П**оследовати разумев стопам Владыки, пресельник отечества был еси и, в пустыни обитая, победу воздвигл еси на противоборныя, Божественною силою укрепляемь.

**Т**вердостию разума, всеблаженне, укрепляемь, различная вражия коварства обличил еси, мудре, и всем явил еси и гордыню онаго возвышенную низложил еси.

**С**вященна ты душою и простоты изволения добродетельми украшена видя, светлейшая звезда Евфимий прият, пророчески вещая твою, всеблаженне, светлость.

**Л**юбовь к Богу и ближнему стяжав, закона и пророков исполняя главизну, преимуществу бо всех несосудно добродетель, отче, исправил еси.

**Р**авноангельное на земли ты жителство стяжал еси, равноангельну же честь Христос тебе дарова, святых чины спутьшествующия души твоей послав.

**Слава:** Премудрости пород явився, начало премудрости возжелел еси – страх Божий, имже укрепляемь, к совершению вместиному человеком, отче, достигл еси.

**И ныне: Богородичен:** Спаса и Избавителя, Бога всех и Господа рождши, нам плотию приобщившася, спасай, Пречистая, призывающия Тя от бед, Владычице.

### Тропарь святого, глас 8:

**С**лез твоих теченьми пустыни бесплодное возделал еси, \* и иже из глубины въздыханьми во сто трудов у плодоносил еси, \* и был еси светильник вселенней, сияя чудесе, Савво, отче наш, \* моли Христа Бога спастися душам нашим.

### Кондак святого, глас 8.

**Я**ко от младенства Богу жертва непорочная \* принеслся еси добродетелию, Савво блаженне, \* садоделатель быв благочестия; \* темже был еси преподобных удобрение, \* гражданин же пустынный достохвален. \* Темже зовем ти: \* радуйся, Савво пребогате.

**Прокимен, глас 7:** Честна пред Господем \* смерть преподобных Его.

**Стих:** Что воздам Господеву о всех, яже воздаде ми?

### Апостол к Галатам, зачало 213.

**Б**ратие, плод духовный есть любви, радость, мир, долготерпение, благость, милосердие, вера, кротость, воздержание: на таковых несть закона. А иже Христовы суть, плоть распяща со страстьми и похотьми. Аще живем духом, духом и да ходим. Не бываем тщеславни, друг друга раздражающе, друг другу завидяще. Братие, аще и впадет человек в некое прегрешение, вы духовнии исправляйте такового духом кротости: блюдыи себе, да не и ты искушен будеши. Друг друга тяготы носите, и тако исполните закон Христов.

Аллилуия, глас 6: Блажен муж бояйся Господа, в заповедех Его восхощет зело.

Стих: Сильно на земли будет семя его.

Евангелие от Матфея, зачало 43.

Рече Господь Своим учеником: вся Мне предана суть Отцем Моим, и никтоже знает Сына, токмо Отец, ни Отца кто знает, токмо Сын, и емуже аще волит Сын открыти. Приидите ко Мне вси труждающиеся и обремененнии, и Аз упокою вы. Возмите иго Мое на себе, и научитесь от Мене, яко кроток есмь и смирен сердцем, и обрящете покой душам вашим. Иго бо Мое благо, и бремя Мое легко есть.

Причастен: В память вечную будет праведник: